

UDHËZIM
Nr.33, datë 5.8.2011

**PËR PROCEDURËN E PRANIMIT DHE REGJISTRIMIT NË PROGRAMET E
STUDIMEVE TË CIKLIT TË PARË DHE TË DYTË TË OFRUARA NGA
INSTITUCIONET E ARSIMIT TË LARTË PRIVAT, SI EDHE PËR TRANSFERIMIN E
STUDIMEVE PËR VITIN AKADEMIK 2011-2012**

Në mbështetje të nenit 102 të Kushtetutës së Republikës së Shqipërisë, të nenit 33, pika 5, të nenit 34, pika 1 dhe të nenit 35 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar,

UDHËZOJ:

1. Institucionet private të arsimit të lartë organizojnë procesin e pranimi dhe të regjistrimit të kandidatëve në programet e studimit të ciklit të parë dhe/ose të ciklit të dytë. Procesi monitorohet nga rektori i institucionit privat të arsimit të lartë (IAL private).

2. Institucionet private të arsimit të lartë shpallin hapjen e procedurës së pranimi të kërkesave të kandidatëve që dëshirojnë të vazhdojnë programet e studimit të ciklit të parë dhe/ose të ciklit të dytë dhe kriteret e pranimi të tyre.

3. Aplikimi për regjistrim në programet e studimit të ciklit të parë dhe në programet e integruara të studimeve të ciklit të dytë, në institucionet private të arsimit të lartë, të kryhen deri më datë 15 dhjetor 2011. Për aplikim, kandidati duhet të dorëzojë dokumentacionin e mëposhtëm:

a) Diplomën e Maturës Shtetërore, së bashku me certifikatën e notave ose diplomën/dëftesën e shkollës së mesme të fituar jashtë vendit, të vlerësuar të barasvlefshme me të në Shqipëri. Kandidatët që kanë përfunduar shkollën e mesme përpara vitit 2011, të dorëzojnë dëftesë pjekurie të shkollës së mesme.

b) Dokumentin e identifikimit (kartë identiteti, letërnjoftim ose pasaportë). Në dosje mbahet vetëm fotokopja e dokumentit të identifikimit;

c) 2 fotografi;

ç) Shtetasit e huaj duhet të paraqesin lejen e qëndrimit në Shqipëri (kopje e noteruar).

4. Në qoftë se kandidati nuk ka dëftesë pjekurie të shkollës së mesme, duhet të paraqesë dublikatë të dëftesës së pjekurisë, të lëshuar nga drejtoria e shkollës së mesme ku ka përfunduar shkollën dhe të konfirmuar nga drejtoria arsimore rajonale/zyra arsimore përkatëse, ose listën e notave të shkollës së mesme lëshuar nga Arkivi Qendror i Shtetit.

5. IAL-të private i dërgojnë Agjencisë Kombëtare të Provimeve (AKP), brenda datës 24 dhjetor 2011, një listë të studentëve të regjistruar, në formë shkresore dhe elektronike (hardcopy dhe në CD). AKP-ja, brenda datës 25 janar 2012, u dërgon IAL-ve private listën përkatëse me numrat e matricullimit të studentëve.

6. Aplikimi për regjistrim në programet e studimit të ciklit të dytë, “Master i Shkencave” ose “Master i Arteve të Bukura” dhe “Master Profesional”, në institucionet private të arsimit të lartë të kryhen deri në datën e përcaktuar nga IAL-të private. Për aplikim, kandidati duhet të dorëzojë dokumentacionin e mëposhtëm:

a) Kopje të noteruar të diplomës së lëshuar në përfundim të programeve të studimeve të ciklit të parë të shoqëruar me listën origjinale të notave;

b) Dokument identifikimi (kartë identiteti, letërnjoftim ose pasaportë). Në dosje mbahet vetëm fotokopja e dokumentit të identifikimit;

c) 2 fotografi;

ç) Shtetasit e huaj duhet të paraqesin lejen e qëndrimit në Shqipëri (kopje e noteruar).

Studentët, të cilët kanë përfunduar studimet e ciklit të parë në të njëjtën IAL private ku aplikojnë për t'u regjistruar në programet e studimit “Master i Shkencave” ose “Master i Arteve

të Bukura” dhe “Master Profesional”, nuk janë të detyruar të dorëzojnë dokumentacionin e mësipërm.

7. IAL-të private i dërgojnë AKP-së një listë të studentëve të regjistruar, në formë shkresore dhe elektronike (hardcopy dhe në CD). AKP-ja, brenda 3 javësh, u dërgon IAL-ve private listën përkatëse me numrat e matrikullimit të studentëve.

8. Pas procesit të regjistrimit në programet e studimit të ciklit të parë dhe/ose të ciklit të dytë, IAL-të private përpilojnë një raport të hollësishëm në lidhje me regjistrimet e studentëve në afatet dhe formatet e kërkuara sipas udhëzimit nr.9, datë 25.2.2010 “Për mbledhjen, përpunimin dhe raportimin e të dhënave statistikore”.

9. IAL-të private regjistrojnë studentët në regjistrin bazë në përputhje me përcaktimet e udhëzimit nr.19, datë 18.7.2007 të Ministrit të Arsimit dhe Shkencës “Për gjenerimin dhe dhënien e numrave të matrikullimit” dhe të urdhrin nr.150, datë 7.4.2008 të Ministrit të Arsimit dhe Shkencës “Për përcaktimin e kodit të regjistrave të studentëve në IAL”.

10. Transferimi i studimeve nga institucionet publike të arsimit të lartë në institucionet private të arsimit të lartë dhe anasjellas të bëhet, sipas kriterëve të përcaktuara në statutet e institucioneve dhe rregulloren e njësisë kryesore ku bëhet transferimi i studimeve.

11. IAL-të i dërgojnë një listë të studentëve të transferuar, në formë shkresore dhe elektronike (hardcopy dhe në CD), AKP-së. AKP-ja bën përditësimin e të dhënave dhe transferimin e numrit individual të matrikullimit.

12. Ngarkohen Zëvendësministri, Sekretari i Përgjithshëm, Drejtoria për Zhvillimin e Arsimit Jo-Publik, Agjencia Kombëtare e Provimeve, si edhe institucionet private të arsimit të lartë për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTRI I ARSIMIT DHE SHKENCËS
Myqerem Tafaj